



Se mottakertabell

Dykkar ref.	Vår ref.	Dato
	16/00431-5	29.04.2016

Høyring : Endring av lokal forskrift om hundehald i Hemsedal kommune.

Hemsedal kommune ved Vilt- og Innlandsfiskeremnda legg ut forslag til endring av: Lokal forskrift for hundehald i Hemsedal kommune, ut på høyring.

Eventuell høyringsuttale skal sendast til Hemsedal kommune, Hemsedalsvegen 2889, 3560 Hemsedal eller postmottak@hemsedal.kommune.no innan 10.06.2016.

Hundelova gjev kommunane heimel til å innføre lokale forskrifter på områder som omhandlar:

- sikring av hund ved bandtvang (Hundelova §6)
- ro og orden mv. (§11)
- antall hundar i ein hushaldning eller på ein eigedom (§12)

Hemsedal kommune har hatt lokal forskrift om bandtvang/hundehald sidan 1985 med heimel i Bufelova, og med heimel i Hundelova frå 2007. Hemsedal kommune ynskjer no å revidere gjeldande forskrift § 2 og § 3.

Vedlagt framlegg til ny forskrift med endring i § 2 og § 3, ny tekst framheva med raudt.

Bakgrunn for endring av forskrifta § 2 er etter innspel frå landbruksnæringa v/ Hemsedal Sau og Geit / Hemsedal Sankelag, og bakgrunn for endringa av § 3 er etter innspel frå Hemsedal Utmarksservice som har ansvaret for løypekøyninga i kommunen.

Bakgrunn for forslag til revidering av forskrifta:

§ 2 Utvida bandtvang av omsyn til husdyr på beite frå 30 september til 31 oktober:

Hemsedal kommune mottok brev frå Hemsedal Sau og Geit og Hemsedal Sankelag med ynskje om endring av lokal forskrift med utviding av bandtvangen om hausten frå 1. oktober til 1. november. Bakgrunnen for førespurnaden er at det dei siste åra har vore fleire saker der sau har vorte uroa, skada og drept av hund på innmarksbeite etter at dei er sankt heim om hausten. Mykje sau i Hemsedal går på innmarksbeite store delar av oktober, og nokre få som enno ikkje er funne og tatt heim går att i utmarka. Det er særleg i haustferien, men også elles utover hausten at laushund er eit problem jamfør søknaden.

Vurdering av kommunen:

Bandtvang og reglane for bandtvang i Hemsedal har vorte sett fokus på dei siste åra, særleg på haustparten då det har vore fleire tilfelle av at laushund har gjort skade på sau. Eit av dei verste tilfella var hausten 2015 då laushund sprengte 6 sau på innmark, der 1 døde på staden og resten måtte avlivast dagane etter. Det har og vore bekymringsmeldingar til landbruksforvaltninga i kommunen om fleire tilfelle av at heimsanka sau etter klypping avslører bitemerke og hol i huda etter bitt. Det er i ein besetning oppgjeve bitemerker i 4 av 20 stk. i ein e-post til kommunen om problemstillinga, noko som i besetninga gir ein høg prosent, og like svært mange uhaldbare episodar.

Hundehaldet i Norge er aukande, og det er stadig fleire som har hunden som kjæledyr og turpartnar. I samband med at tal hendingar med bufe og hund har vore aukande dei siste åra er dette no teke tak i på fleire område. Næringa har laga plan for ny og oppdatering av skilting med opplysningar om bandtvang på mykje brukte stigar i kommunen, og 40 nye skilt med informasjon om bandtvang vert om alt går etter planen utplassert av næringa i 2016.

Det er også nokre år sidan kommunen har hatt utmarksoppsyn. Dette er det sett fokus på, og ny tilsett ved Hemsedal Utmarksservice som skal ha full stilling i sumarmånadene har dette i stillingsbeskrivinga si. For å få begrensa politimynde må utmarksoppsynet ha kurs, og det er planlagt at nytilsett og dagleg leiar hjå Hemsedal Utmarksservice skal ta dette. Om utmarksoppsynet kjem på plass til barmarkssesongen i 2016 er avhengig av dette kurset og derfor enno uklart.

Kommunen har også nå ein av dei siste dagane fått henvending frå personar som ynskjer ein «hundepark» i kommunen. Dette er eit areal der hundeeigaren har lov til å ha hunden laus.

Kommunen meiner det vil vera rett å utvide bandtvangen i tråd med Sau og Geitealslaget sitt innspel. Hemsedal er ein turistkommune, og vi brukar aktivt Hemsedal sin flotte natur og utmark i marknadsføringa av kommunen. Vi ynskjer utvikling og auke i turismen og at gjestene våre skal vere aktive og bruke naturen. Vi legg til rette med stigar og tiltak som til dømes «Topp 20» noko som leidar svært mange ut i marka, mange også med hund. Det er viktig at ein ved å utvide bandtvangen til 31. okt. tek omsyn til dei som brukar den same naturen og ressursane til husdyrhald og matproduksjon og at bufe kan ferdast trygt i forhold til vår bruk av naturen og vårt hundehald, og ikkje vert skadelidande. Det har også vore fleire uheldige episodar på inngjerda beitmark nede i bygda. Dette er sau som er sankane ned frå fjellet. Desse episodane syner at det er viktig med bandtvang til størstedelen av småfeet er kome i hus, noko som vil vera tilfelle 31.oktober.

§3 bandtvang i preparerte skiløyper i kommunen

Hemsedal kommune har også fått henvending frå Hemsedal Utmarksservice der dei ber om revidering av lokal forskrift i høve bandtvang i skiløypene i kommunen.

Hemsedal Utmarksservice begrunnar ynskje om endring med:

- Hemsedal Utmarksservice begrunnar ynskje om endring med:
- Ål kommune har endra si forskrift likelydande Utmarksservice sitt framlegg i 2015. slik det er no har Hemsedal kommune ikkje bandtvang i løypene i Holdeskaret
- (høgfjellsløyper), medan Ål kommune har bandtvang i dei delane av løypenettet som ligg i Ål kommune. Dette er umulig å forhalde seg til.
- Trafikken i skiløypne har auka sidan gjeldande forskrift vart vedteke i 2007. Fleire skiløparar og ikkje minst fleire hundar. At nokon hundeeigarar ynskjer å ha hunden i

band medan andre ynskjer å ha hunden laus skaper unødvendige konflikhtar hundeeigarar imellom.

- Auka trafikk i skiløypene gjer at det oppstår fleire konflikhtar der lause hundar er til sjenanse for ungar og andre som ikkje likar hundar
- Løypekøyrarane ser til stadigheit at lause hundar øydelegg nypreparerte spor, til irritasjon for andre skiløparar
- Utmarksservice meiner dagens reglar er for kompliserte. Kva er høg fjellsløyper, kvar går grensa mellom dalløyper og høg fjellsløyper utan bandtvang
- Ved innføring av same forskrift som Ål kommune har i dag, vil alle skiløparar ha klare reglar å forhalde seg til. Erfaringane frå Ål er gode, det er enkelt å informere og det rådar ein viss sjølvjustis.
- Bandtvang i vinterferie er vanskeleg å overhalde når vinterferien er spreidd over fleire veker etter kva fylke du bur i.
- Dagens forskrift er nærmast umulig å kontrollere og vanskeleg å føre oppsyn med, ny forskrift vil vera enklare.

Vurdering av kommunen:

Slik det er i dag har det ikkje vore bandtvang i høg fjellsløypene i Hemsedal. Dette er løyper ved Harahorn/Vavatn, Holdeskaret/Beihovdløypa, Hundsemvatnet/Lægeret og Bulien/Storeskar. Det har vidare vore bandtvang i Gravsetområdet i 2, 3, 5 og 8 km rundane heile vintersesongen, og resten av løypenettet i kommunen har hatt bandtvang i jul, påske og vinterferiar.

Hemsedal Utmarksservice ynskjer endring til at det skal vera bandtvang i alle maskinpreparerte skiløyper heile skisesongen. Dei meiner dette vil vera mykje enklare å forhalde seg til for alle brukarar av anlegga.

Det er mange døme på at dagens forskrift er for lite presis, og slik vert vanskeleg å handheve. Til dømes då den viser til høg fjellsløyper, noko som for mange kan vera vanskeleg å definere. Det kan for mange vera usikkerheit om t.d. 3 mila er ei høg fjellsløype. Høg fjellsløypene i Holdeskaret som har bandtvang i den eine kommunen og ikkje den andre blir også vanskeleg – kvar går kommunegrensene i terrenget, og det synest merkeleg med ulike reglar i same område.

Bandtvang i vinterferie er komplisert då vinterferieveka varierer etter kvar du bur i landet. Det er vanskeleg å ha oversikt over når andre regionar har vinterferie, og det blir vanskeleg å forhalde seg til for tilreisande og lokale skiløparar.

Tilreisande til Hemsedal aukar, og ein ser også at det å bruke langrennsløypene vert stadig meir populært. Utviklinga med produksjon av kunstsno, og Gravsetstugu er også med og utvidar skisesongen og gjer dette området meir nytta. Hemsedal Utmarksservice har ansvaret for løypekøyringa i kommunen og påpeikar problema med å handheve ei forskrift som er upresis, samt at lause hundar ikkje er ynskjelege i skiløypene med bakgrunn i auka trafikk, ungar og også problem hundeeigarar imellom.

Bandtvang i alle skiløyper er ei innskrenking i høve til gjeldande forskrift. Dagens forskrift har skilt på løypene si plassering, og kva tid det erfaringsvis er flest folk i sporet. Hemsedal Utmarksservice sitt forslag til endring vil vera vanskeleg å misforstå og slik enkelt å kommunisere. Dette vil gjera det enklare å handheve forskrifta. Hunden har framleis lov il å

vera med ut i løypene, under føresetnad av at eigaren har hunden i band og har kontroll over den.

Konklusjon:

Forslag om hundehald, Hemsedal kommune, Buskerud vert lagt ut på høyring med endring av §§2 og 3 i tråd med forslaga frå Hemsedal Sau og Geit/Hemsedal Sankelag og Hemsedal utmarksservice. Forskriftsendringa skal handsamast på nytt i Vilt og innlandsfiskenemnda etter at høringsprosessen er over. Nemnda kjem med endeleg forslag til endring av forskrifta som tilråding til kommunestyre som gjer endeleg vedtak i saka.

Mvh

Med helsing

Viel Ribberud
Hemsedal kommune

Mottaker	Kontaktperson	Adresse	Post	Land
Hemsedal og Gol Bonde- og Småbrukarlag		v/ Jeremy Wilson Lykkjavegen 212	3560 HEMSEDAL	
Lokalt Skogutvalg Hemsedal		v/ Christer Carlsen Øvre Hemsedalsveg 613	3560 HEMSEDAL	
Hemsedal Jegerforening		v/ Odd A. Halbjørhus	3560 HEMSEDAL	
Norsk Kennelklubb Buskerud		Postboks 163 Bryn	0611 OSLO	
Nes Kommune		Kommunehuset	3540 Nesbyen	
Gol kommune		Gamlevegen 4	3550 Gol	
Hol kommune		Ålmannvn. 8	3576 HOL	
Flå kommune			3539 FLÅ	
Ål kommune		Torget 1	3570 ÅL	
Hemsedal Elgvald BA		v/formann Olav Wollebæk	3560 HEMSEDAL	
Hemsedal Skiforening v/Finn Solbakken				
Hemsedal utmarkservice v/leiar Ole Nils Aalrust			3560 HEMSEDAL	
Hemsedal bondelag v/ Olav Huso		Lio	3560 Hemsedal	
Hemsedal Sankelag v/Bjarne Gjærde			3560 HEMSEDAL	
Hemsedal sau og geitealslag v/Raymond Sagsveen			3560 HEMSEDAL	
Hemsedal Turistkontor v/ Richard Taraldsen			3560 HEMSEDAL	